



煞猛个鴨嫲

寮仔裡背，鴨公同鴨嫲共下生活，每一個人都自由自在，生卵个生卵、吮草个吮草，這陣鴨仔看起來和和樂樂，日仔過啊還暢樂。

講到生卵，一隻鴨嫲大約勢每日都做得生一粒卵。天光過後，主人來餵大家人食朝，佢係有拈著差毋多量个卵，大家人定著有好食到飽。係鴨嫲毋罇煞猛，卵無恁多，初滿主人會同飼料个量增加，係無就調整。萬一連續幾下日卵个量都毋足，嘎就壞蹄地！主人會擇一、兩隻老鴨嫲，同佢等扭走，有時節，係有過後生又搭忒瘦个，也會分佢扭走。

該兜鴨嫲裡背，有一隻盡煞猛，佢每日最少都會生出一粒卵。佢認為生卵毋單淨係本分，乜係佢等在這個寮仔裡背生存个唯一方式。除忒佢，其他乜有幾隻同佢共樣，盡煞猛生卵。

毋過，就有一隻懶骨頭，淨好搞。佢一哪仔都去搞，無就尋兜奇奇怪怪个東西。佢懶尸罔懶尸，但係做人盡大概，故所厥朋友還算毋會少。有幾下擺，該懶骨頭淨顧搞，根本都無生半粒卵，主人愛來拈卵進前，厥朋友驚佢會有問題，就陪一粒卵分佢有好交代。

這種事情發生幾下擺過後，該隻最煞猛个鴨嫲就行去話該懶骨頭：「生卵係佢等鴨仔个本分，你仰做得淨顧搞？連卵都毋生？」

該懶骨頭連應都無愛應佢，乜毋搭佢，自家就行開去別个地方續等仔搞地。

該最煞猛个鴨嫲譴啊無結無煞，就一哪都投入。佢同其他个鴨嫲講：「佢等恁認真生卵，該隻懶骨頭仰做得無生半粒卵，淨顧搞？毋盡自家个本分來做事？恁毋成猴！」

別人聽著就勸話佢：「莫食恁飽管人个閒事，自家做好自家个事頭就好。」

聽著其他人恁仔應，佢就譴嘟嘟仔講：「你等這兜聚概都同佢共樣，隻隻都係壞鴨嫲！」下後，這最煞猛个鴨嫲講乜奇怪，見係看著別人聚共下，就會覺著佢等在講厥壞話，跔等就走去同該兜鴨仔大細聲吵事。漸漸仔，厥朋友緊來緊少地！大家人共下寮，係遠遠看著佢行來，就共快散棚。恁仔一來，顛倒分佢認為大家正經就係在講厥壞話。

有一日，這最煞猛个鴨嫲忍毋下去地。佢想著自家恁煞猛生卵，別人嘎做得輕輕鬆鬆，就打算等到主人來該下，愛想辦法分佢知這兜事情。

佢沉沉仔晡啊在懶骨頭个脣口！主人攞等早朝來，正同料仔倒啊在豬兜裡背，懶骨頭看著食就走第一，佢完全就無注意著有人晡等佢。佢一行啊開竇，該隻鴨嫲就黏時走過去，同厥竇裡背个卵陪啊遠遠。其他个鴨嫲看著，就聚概湊上去愛擋佢。佢覺得大家人愛欺翕佢，就惡豺豺仔爪人、用嘴齧人家个毛。

主人看著鴨嫲相打地，就同攞料仔个井桶放下，行前去同該隻最煞猛个鴨嫲扭起來。主人呻地一下講：「恁孤盲，毋生卵，淨知啊相打，扭歸來去過好，莫同別隻鴨嫲爪傷地。」

主人扭核該隻最煞猛个鴨嫲，攞等井桶緊行緊遠地。該鴨嫲還本本大嫲聲喊等：「無好扭，佢係最煞猛个，愛扭懶骨頭正著！愛扭佢正著！」

作者：陳志寧

☆詞彙學習☆

【初滿】cu' man'：一開始。

【井桶】jiang` tung`：鐵製水桶。

【大概】tai koi'：慷慨。

【孤盲】go' mo'：罵人的話語。

【聚概】qiug` koi'：全部。

【沉沉仔】dem` dem` e'：低頭不語。